



REPUBLIKA E SHQIPËRISË
KOMISIONERI PËR MBROJTJEN NGA DISKRIMINIMI
DREJTORIA E ÇËSHTJEVE PROCEDURALE LIGJORE DHE MARRËDHËNIEVE ME JASHTË

Nr. 644 Prot Tiranë, me 11 . 11 .2013

Lënda: Dërgohet rekomandim për nxitjen e programeve të punësimit për grupet vulnerabël

Drejtuar : Zyrës Rajonale të Punësimit

LEZHË

Për dijeni: **Z. Genci KOJDHELI**
Drejtor i Përgjithshëm
Shërbimi Kombëtar i Punësimit

TIRANË

I nderuar Z. Drejtor!

Komisioneri për Mbrojtjen nga Diskriminimi në përmbushje të qëllimit të ligjit nr. 10 221 datë 04.02.2010 “Për mbrojtjen nga diskriminimi” për të garantuar të drejtën e çdo personi për barazi përpara ligjit, mbrojtje të barabartë nga ligji dhe mbrojtje efektive nga diskriminimi dhe çdo formë sjellje që nxit diskriminimin si dhe bazuar në kompetencën që i jepet në bazë të nenit 32, pika 1, shkronja “f”, të këtij ligji, për të bërë rekomandime për çfarëdo lloj çështje që lidhet me diskriminimin, parashtrohet sa më poshtë vijon:

Në kuadër të projektit me titull “*Për mbrojtjen dhe promovimin e të drejtave të personave të diskriminuar*”, të Komitetit Shqiptar të Helsinkit (KShH) në partneritet me Komisionerin për Mbrojtjen nga Diskriminimi , mbështetur financiarisht nga Zyra e Kooperacionit Zviceran në Tiranë, po zhvillohen Ditë të Hapura dhe takime me OJF-të në qytete të ndryshme të Shqipërisë, me qëllim rritjen e ndërgjegjësimit për Ligjin “Për mbrojtjen nga diskriminimi” dhe zbatimin e tij të plotë nga gjithë aktorët e përcaktuar në ligj.

Në Ditët e Hapura, Komisioneri për Mbrojtjen nga Diskriminimi dhe KShH kanë konstatuar si një ndër problematikat më të rëndësishme mungesën e punësimit për grupet vulnerabël, veçanërisht për komunitetin rom dhe egjiptian si dhe personat me aftësi të kufizuara.



Adresa: Rruga Sami Frashri, Nr. 10, Kati II, Tiranë
(Tek godina e Fondit Shqiptar të Zhvillimit)
Tel: +355 4 2431078
Fax: +355 4 2431077
e-mail: info@kmd.al
web: www.kmd.al

Përsa i përket punësimit të komunitetit rom dhe egjiptian, mund t'i referohemi "Dekadës së Përfshirjes së Romëve", një dokument i cili synon integrimin e minoritetit Rom në Shqipëri në jetën social-ekonomike, ku punësimi është një nga prioritetet globale dhe Planit Kombëtar të Veprimit 2010-2015, i cili fokusohet në katër fusha kryesore, një nga të cilat është punësimi. Një nga qëllimet strategjike të Dekadës Rome parashikon fuqizimin e komunitetit Rom përmes rritjes së aksesit në tregun e punës, programeve të trajnimit dhe skemave të mbrojtjes sociale. Një nga pikat nëpërmjet të cilave parashikohet të arrihet ky objektiv është inicimi dhe zbatimi i programeve të veçanta që mundësojnë punësimin e Romëve, kryesisht nëpërmjet kryerjes së një studimi mbi situatën dhe shkaqet e papunësisë tek Romët; organizimit të fushatave informuese mbi mundësitë dhe përfitimet nga programet e punësimit; *përfshirjes më e madhe e Romëve në skemat për nxitjen e punësimit të individëve në nevojë, si skemat subvencionuese të pagës dhe kreditimi i taksave për punëdhënësit* dhe integrimi i komunitetit Rom në edukimin e përgjithshëm publik dhe trajnimin profesional kryesisht nëpërmjet hapjes së programeve të formimit profesional dhe programeve të tjera kualifikuese për të rinjtë Rom; ofrimit të kurseve të formimit profesional për të rinjtë Rom në punë tradicionale artizanale; përmirësimit të cilësisë së programeve të trajnimit profesional apo organizimit të fushatave informuese mbi të drejtat dhe detyrimet e Romëve në fushën e punësimit, programeve të ndihmës, dhe skemës së sigurimeve shoqërore.

Plani Vendor i Veprimit i Bashkisë Lezhë për Integrimin e Romëve dhe Egjiptianëve 2013-2015, është një dokument i rëndësishëm i kësaj njësie vendore i cili synon integrimin e komuniteteve rom dhe egjiptian në jetën social-ekonomike. Një nga fushat në të cilat bazohet ky plan është punësimi dhe mbrojtja sociale, duke theksuar në këtë mënyrë prioritetet e "Dekadës së Përfshirjes Rome". Në fushën e punësimit, qëllimi i këtij plani vendor konsiston në përmirësimin e qëndrueshëm të situatës ekonomike të familjeve të komuniteteve rom dhe egjiptian nëpërmjet rritjes së mundësive për punësim, janë parashikuar edhe aktivitete konkrete për t'u ndërmarrë në përputhje me objektiva specifik.

Nga ana tjetër, lidhur me punësimin e personave me aftësi të kufizuara, citojmë se në Ligjin Nr. 7995 datë 20.9.1995 "*Për nxitjen e punësimit*" (ndryshuar me ligjin nr. 8444, datë 21.01.1999, me ligjin nr. 8862 datë 7.03.2002 dhe me ligjin 9570 datë 3.7.2006), thuhet shprehimisht se "*çdo punëdhënës që punëson me tepër se 24 punonjës, është i detyruar të punësojë një person me aftësi të kufizuar për çdo 25 punonjës të personelit të tij*".

Sa më lart, në mbështetje të nenit 1 të Ligjit Nr. 10 221 datë 04.02.2010 "*Për mbrojtjen nga diskriminimi*", që parashikohen shkaqet e diskriminimit dhe nga ku komuniteti rom/egjiptian dhe personat me aftësi të kufizuara hyjnë në objektin e këtij ligji dhe nenit 11 të këtij ligji që parashikon marrjen e masave të përkohshme dhe të veçantë që synojnë përsheptimin e vendosjes reale të barazisë, kur mungesa e barazisë është shkaktuar nga diskriminimi,



Adresa: Rruga Sami Frashri, Nr. 10, Kati II, Tiranë
(Tek godina e Fondit Shqiptar të Zhvillimit)
Tel: +355 4 2431078
Fax: +355 4 2431077
e-mail: info@kmd.al
web: www.kmd.al

konsiderohet veprim pozitiv dhe nuk përbën diskriminim, si dhe me qëllim garantimin e barazisë dhe mosdiskriminimit:

REKOMANDOJME:

1. Zyra Rajonale e Punësimit të ketë përparësi punësimin e komunitetit Rom dhe Egjiptian.
2. Zyra Rajonale e Punësimit të sigurojë respektimin e Ligjit Nr. 7995 datë 20.9.1995 “Për nxitjen e punësimit”.
3. Zyra Rajonale e Punësimit të bashkëpunojë me Bashkinë Lezhë për nxitjen e programeve të punësimit për grupet vulnerabël, veçanërisht për komunitetin Rom dhe Egjiptian dhe për Personat me Aftësi të Kufizuar.

Duke besuar ne mirëkuptimin dhe bashkëpunimin Tuaj,



Adresa: Rruga Sami Frashri, Nr. 10, Kati II, Tiranë
(Tek godina e Fondit Shqiptar të Zhvillimit)
Tel: +355 4 2431078
Fax: +355 4 2431077
e-mail: info@kmd.al
web: www.kmd.al